

【渡阿姆食飯】張美容原作

逐年差毋多會到母親節該下，斯會看著恁樣个文章，裡肚个意思係講：「 偲俚細細該下，食飯食到滿頭滿面、哪位搞到狼離狼犁，爺哀毋會打也毋會罵，好心好性教偲俚擎箸、收擎；學行該時，爺哀毋盼得偲俚踉倒，背痾痾牽等偲俚个手，教偲俚學打燈、學徒步，全毋驚麻煩、毋驚辛苦。這下爺哀多歲咧，手腳無恁靈通，長下食飯時節飯糝叭叭跌¹，行路時節踉踉踉，做子女个愛多兜耐心幫忙佢，毋好棄嫌佢、責備佢。」見看著恁樣个文章，偲个心肝肚就有淦淦个感動，目珠眶強強紅起來。

偲姆今年九十歲咧，情形摻文章肚寫个共樣共樣。前幾年還會煮飯、畜頭牲、打版，這兩年看等弱漬下去，出門愛坐輪椅、食東西像委秧仔樣、摻人講話總係人講東佢應西。看著這種情形，偲兩姊妹無麼个敢渡佢出去食飯，一方面嫌麻煩，一方面驚餐廳个頭家毋歡迎，所以逐擺渡佢出去寮，到晝斯買兜東西帶轉屋下食。

一直到有一擺，偲聽老弟講佢一儕渡阿爸、阿姆去石門水庫

寮，順續在該食晝，該日堵好拜六，餐廳人客當多。老弟輪等搵坐輪椅个阿爸、阿姆落去，偲聽著黏皮問：「 頭家會毋歡喜無？」言知，頭家娘毋單淨無嫌佢兜人少又杈人²，還一路喊大家閃開兜，留一條較闊个路分佢兜過。最感心个係，頭家娘又搵一隻窗門脣看得著湖景个位仔分佢兜坐，偲心肝肚想，頭家娘一定係分偲老弟个孝心感動。偲知差咧，「 孝心」係美德，人看你對爺哀恁有孝，安謐斯有，仰會博人惱！

想著頭擺摻爺哀共下出去食飯，安到陪佢兜食飯定，摻佢兜打打嘴鼓、謔哆謔哆斯做得，當自然³。這下無共樣咧，毋係陪阿姆食飯，係安到渡阿姆食飯。食飯該下，老弟驚阿姆食到滿身，摻佢个胸前圍坭帕仔；驚阿姆食忒少，密密摻佢挾菜拐佢食；又驚阿姆食湯哽著，一湯匙一湯匙慢慢仔飼佢；還愛一下一下摻阿姆黏在嘴角个飯菜拈忒、粹淨。看著恁樣个情景，偲黏皮想起母親節該篇文章，無毋著，這下老弟做个，就係頭擺阿姆一一為子女做个，做子女个仰做得棄嫌爺哀！仰做得推懶！

¹ 叭叭跌：音 bad` bad` died；紛紛掉落。

² 杈人：音 ca⁺ ngin；妨礙他人。

³ 當自然：音 dong` cii⁺ rhan；很自在、舒適、輕鬆。

【圍牆脣个黃梔仔¹】彭瑞珠原作

學校个圍牆脣有一頭黃梔仔，分人種在小型焚化爐脣，大樹會遮著佢東片析日頭，比人較高个圍牆又籬在佢西片析，所以，佢个日照無盡足。好得，地泥下个泥肉貴，佢个生命力又強，佢就逐日追等圍牆个高度緊生緊高。一陣春分个大水過後，佢還盡命牯伸枝出葉，開出雪白个花。

「唔，還香哦，係黃梔仔！佢盡中意个花。」渡學生仔去拚掃个僱，用手搨掃樹葉仔，頸根掇²轉黃梔仔，鼻空鼻等該花香，全全無想徒步，圍牆該片還有滿天个紅霞。

第二日朝晨落教室，佢會鼻空都還鼻得著該花香？啊哦，毋係僱心神，係僱事務桌頂排到淦淦个花。一來花香錫人，二來僱會愁圍牆脣該頭黃梔仔，害僱心肝嘎嘣嘣跳、嘣嘣飆。毋過，僱還係軟聲个問：「麼人呢？係麼人摘恁多花送分先生係無？」一屋間个學生仔，怕係分僱又歡喜、又愁慮个聲哨搥到哈哈大笑。

「先生，你揣啊，你揣看啊！」

阿文？阿俐？毋係，係阿航！阿姆哀唷，係該上課尋人毋著，下課撩刁、手銃、屋下又混雜，全學校都無人奈得佢何个阿航！這擺正經死無命咧，該頭靚靚个花樹，定著就頭疤面疤，伸無半條命咧！難怪，昨晡臨暗阿航共樣無去拚掃，還長下在僱脣頭跳上跳下。

毋過，僱還係客氣个講：「承蒙唷！」心肝肚毋放心，又試探个問佢：「你哪來恁多个香花呢？」

佢難得在教室企到正正，歡頭笑面、沙鼻攏攏个應僱：「你毋係講，你盡中意這花？僱屋下當多哦！嘻嘻，僱婆講，愛送分先生哦？去摘，去摘，煞猛摘！你還愛無？韶早，僱過摘分你！」

帶等混雜又略略仔面燒个心情，僱影過該一桌个雪白，看向佢：「承蒙你，承蒙你送分先生，恁香个花。」該日个花香，僱永久記得，同時，也會惱起圍牆脣个黃梔仔。雖然，佢兜个生存條件毋好，毋過，佢兜也有佢兜个單純雪白，還會分享花香分人。

¹ 黃梔仔：音 vong gi`er；梔子。

² 掇：音 ngau~；折、轉。

編號 03 號

【幸福】李幸妃原作

麼个係幸福？仰般正算係有福氣？你識感覺著幸福無？

佢記得有人恁樣講過：「假使你有一隻蘋果，佢乜有一隻蘋果，佢俚互相交換這兜蘋果，恁樣逐儕還係正有一隻蘋果。毋過，假使你有一種想法，佢乜有一種想法，佢俚互相交流這兜想法，恁樣逐儕个心肝肚就會有兩種無共樣个想法。」

在教學个過程裡肚，佢最愛乜最慣摻細人仔分享生活中个微末節，可比講：這站時間聽著个笑話、出去遶寮个時節看著个生趣事，分享讀著一本好書裡肚个一句好話，抑係現時社會在該時行麼个這兜；漸漸仔，細人仔也會在下課个時節，走過來摻佢講心肝肚个話，聽看啊佢个想法；無定著會幫忙著麼个，有時佢斯做一個無聲个聽眾定！記得有一擺，一個笑微微个細妹仔，恬恬仔行兼佢个臉身脣，細細聲問講：「先生，你敢知麼个雞最遠？」佢想來想去，看該看這，額結結應講：「敢係火雞？火雞走最遠哦！」佢講：「毋著！毋著！毋係火雞，係麥克雞！因為『麥克雞塊¹！』『快』就係遠啊！著無？」聽了，兩儕笑到哈哈

滾，笑到愛搨肚屎！有影啦，細人仔人个想法直接合單純！該時，佢感覺幸福就係分享。

逐擺到當晝歇暈，同事定著會留佢在學校共下食晝！毋過，佢總係笑笑回講：「承蒙啦！佢轉來去屋下食！佢姆會等佢轉去食！」轉屋下摻世大人共下食飯變做這下最福氣个時節。最滿个老弟無在咧个事實，分佢懊惱無把扼姊妹仔共下个時間，愛加兜關心加兜注意，愛加講幾句話！屋下突然間个恬靜，正知兄弟姊妹會冤家、相爭、相罵、受氣，乜係一種个福氣！看著該桌頂阿姆煮个飯菜，雖然毋係麼个山珍海味，斯簡單个煎魚仔、炒薤菜摻番薯飯定，毋過食落肚屎肚，嘎甜在心肝頭，還做得坐共下食阿姆煮个飯，該係一種福氣个味緒！

佢對幸福个想法，跔等年歲越大越改變，跔等經歷个事情越多越珍惜。佢愛个幸福當簡單。逐朝晨目珠擘金，看著日頭晟對窗門落來，日頭个光線走落來摻佢講恁會早；敲一下大氣，感覺著還生存等个歡喜；圍牆脣該頭木棉樹，柑仔色个花蕊跌落泥下，就像摻大地鋪一埕柑色地毯，該落花有落花个靚；臥頭看天，雲在該走相追，鳥仔在該搞園人尋，感覺著世界在該停動个節奏。幸福愛用心去體會，用心去感受，心肝肚有愛、有感恩个心，幸福就係恁簡單。其實做一个知足感恩个人，逐日都會係福氣、快樂个，都做得享受著福氣个好味緒！

¹ 麥克雞塊：音 mag` kied gai` kuai`；麥克雞塊，諧音麥克雞快。

【你个抑係偈个】劉玉蕉原作

人在世間，短短幾十年，萬事萬物，時時變，日日換，麼个係你个？哪隻係偈个？等你雙手一放，氣脈一絕，做下係天公个，該兜你捨毋得，往時嘴叮輒輒講个「偈」，到這下做下變做「曾經」，像雲，像煙，過忒斯無留半息蹤跡咧。

該日，載阿嫂去山頂避暑，車仔行過該遍，偈識喊佢安做「偈个山」个山林，遠遠看去，大樹還係高天天，綠葉榮榮，哪係柿樹？哪係梅？目珠一瞞斯起濛煙咧！斯知講，這下該草竇因得老虎著。阿嫂問：「愛落去看看、遶遶仔無？」偈應佢：「傷心所在，莫看有較贏！」話講一半，車肚个空氣一下斯凝凍¹咧！車仔緊行，兩儕恬恬，想个係共件事，恁个係像煙、像雲个「偈个」。

家官好種蘭花，傳到老公共樣恁好，平常時除了上班，摸花、顧花个時間占忒大半，長著錢咧，心心念念斯想買一垵地來做花園。田地、山林、沙埔遶忒好多所在，最尾，相中意天冷个好地理，陽面山連等鋪平个旱地，盡錫人个係合界該條坑，清淨个坑水長年流無停，白鶴花像排列樣，企在兩片脣，開花時節斯

像白色个蝶仔，停在坑脣葉面，風一吹，撲啊撲，斯撲到人个心肝肚去咧，淡淡个花香，撩人鼻空，像搞園人尋个細孬仔樣，無注意著斯揆你一下，分人有期待、有歡喜。

寮日，偈歸屋人打早斯出門，食个、搞个、做事个工具攞攞摯，一臺車斯堵好尖滄滄，準遶山花樣，定定駛上山。山風涼涼，坑水清清，細人仔摻老公搨手摨泥結礮，想做細陂塘來畜魚仔，汗出罅咧，斯係佢三兄弟个搞寮時間，捉魚搞水，打草蝨、攀籬吊壁……，搞到貶轉來。橋下个大石牯係偈个洗衫枋，鞋一脫，屎肫一頓，斯真有樣哩啲，衫褲个啊个，分人恁想著頭擺老屋後背該條大水溝，水共樣恁清淨，个衫褲个動作也共樣無變，孤孤細手變大手，偈既經係三個細人仔个阿姆咧！

好光景過無兩年，頓柱牽棚正搥好，壞咧！921 大地動一搖，崩崗啟岫，走山走到無款，先前盡錫人个山坑水，一起躉面斯麼人都毋識咧，細坑變做大河壩，隆隆滾²拚往下个山坑水，摻歸隻旱地切做兩股，斯伸著澄澄个山林，還過山下一條車路，白鶴花該迎等風開展个笑容呢？無咧！細人、大人用汗水換來个陂塘、花園呢？跔水走咧！一屋人該量時留在山林肚个笑聲，跔等風，流流流流，遮蔭个大樹知得，偈這兜「識」在這位歡喜停跔。

麼个係你个？重要無？水一沖、火一燒，做下變做記憶，你抓捉著麼个，無啊！

¹ 凝凍：音 kien dungˋ；凝結。

² 隆隆滾：音 lungˋ lungˋ gunˊ；狀聲詞。

108 年全國語文競賽客家語朗讀文章教師組（海陸腔）

編號 05 號

【蓮霧樹下個花園】羅紫云原作

佢屋下個屋側角，有一叢蓮霧樹，有 30 零歲咧，樹身當旺，有青溜溜個樹葉仔，逐年舊曆五月左右就會開花，但係，毋識打有蓮霧好食，實在奇怪，鄰舍講佢係半公嫲，會開花毋會結子。雖然無收成，毋過蓮霧樹就像一支大青遮仔，樹下涼沁沁仔，係一隻盡靚盡好奈涼個位所哦！

佢在該頭蓮霧樹下，種有當多種花草，有好陰涼毋好晒日頭，無愛忒多水分個「多肉植物」，像油蔥、佛珠、白牡丹、水芙蓉、海芋、藤類這兜，有個吊在樹極頂，有個跔等樹頭下排做一隻圓圈仔。係愛淋水、需要日頭晒、會開花個花種，像大紅花、喇叭花、打碗花、蘭花、玫瑰花、頂中仔、清明草、繡球花、蓮花、芙蓉、蓮蕉花這兜，就排在外圍做第二隻圓圈仔，有兜佢知名仔，有兜佢毋識佢，總講一年四季有無共樣個花開，分人欣賞看靚。

這隻同心圓個花園，係佢個好朋友，該毋單淨係花園定定哦！乜係一隻細細隻個動物園，有鳥仔、蚊仔、蝶仔、蜂仔、囊蜆仔、蟾蜍、蚴仔，還有逐日朝晨暗晡，都愛撮一撮飼料餵佢

個——魚仔摺田螺。魚仔、田螺畜在蓮花鉢肚，佢兜個群組就係這下當流行、時尚個「魚菜共生」，魚仔食蚊仔，田螺食垃圾，淨化水質，蓮花個養分就來自魚仔摺田螺，係當環保個方式哦！

家事做忒，一下有閒，就會去花園，擲草、捉蟲仔、淋水、賞花、看魚仔，摺該兜花花草草講話，摸摸搵搵，這係佢逐日歡喜甘願愛做個快樂頭路，毋管發風落水，都一定會去遠遠看看個位所，尤其係兜一張凳仔坐等看魚仔，看該魚仔屎肫扭啊扭，無愁無慮，自由自在，樂線樂線個樣仔。佢個心就開，天轉笠嫲花，一身個疲勞乜就消除忒咧～。

成下還會帶鄰舍、朋友共下來參觀佢個花園，坐奈打嘴鼓，共同研究推廣「魚菜共生」個做法哦。人多意見多想法乜多，佢接受大家建議，慢慢規畫、改進，加幾隻醃缸做第三同心圓，醃缸肚畜福壽鯽，面頂種青菜、瓠瓜，有人客來，菜就便便咧！雖然這花園細細仔，毋過這下變到當齊全當靚咧。

108 年全國語文競賽客家語朗讀文章教師組（海陸腔）

編號 06 號

【毋會肚屎枵个阿姆】曾菁怡原作

看著歸桌錫人个料理，炒肉、爌肉、豬腸炒薑絲、肥湯炆筍乾，還有佢最好食个菜脯卵，該香噴噴个味緒斯分人口水落落跌。

「阿姆，遽遽來食哦！」佢忍毋核先拈一坵炒肉放落嘴肚。

「你兜先食，佢還毋會肚屎枵。」阿姆還在熱爌爌个灶下無聞直掣。阿姆个手路已好，歸桌个飯菜黏時就分佢兜食到淨淨。

食飽飯，阿姆總係會切一盤果子分大家食。

「阿姆，共下來食啊？」佢喊等行往出个阿姆。

「你兜先食，佢還飽餬餬仔。」阿姆笑笑仔應佢。

逐擺就恁樣，係有煎魚仔，阿姆都會講：「佢愛嚟魚頭，該留分佢就好。」係有雞肉，阿姆又係講：「佢好食雞爪，該留分佢就好。」係有雞卵糕，阿姆又會講：「佢毋好食甜，你兜食就好。」阿姆總係食恁少，從細，佢毋識聽佢喊過肚屎枵。

逐擺有錫人个好料，阿姆長下就講：「你兜先食，佢還毋會肚屎枵。」無就講佢食無恁多，喊佢兜煞煞食忒，毋使留分佢。佢兜乜正經戇戇相信阿姆食毋落，自家煞猛食到肚臃臃仔。

等到自家做阿姆，俵仔、妹仔講愛食麼个，佢就盡命牯變出來；人講哪位有好食个，佢就趑趑走去買轉來分佢兜享用。心肝肚總係掛念俵仔、妹仔愛食麼个？敢有食飽？會肚屎枵無？看著佢兜食到笑咪咪仔，佢就感覺心滿意足，肚屎飽咧。原來，毋會肚屎枵个阿姆係因為子女滿足个笑容，係因為對子女个痛惜，係恁樣濃厚个親情啊！

想著阿姆頭過總係坐在脣頭，看佢兜像八爪魚樣膠飯菜划到淨淨；想著阿姆逐擺對市場轉來總係攞等佢兜盡好食个零嗒，自家嘎無麼个食；想著阿姆切好歸盤个果子，自家罕得拈一坵來食，佢个鼻空忽然間感覺一陣酸楚，目珠矇矇咧，阿姆毋識講佢有幾惜佢兜，但係佢个行動早就表達最偉大个母愛咧。

這下，阿姆个牙齒毋好，背囊痠痠，動作也較慢板咧，佢還係習慣坐在脣頭，溫柔講：「你兜先食，佢還毋會肚屎枵。」佢心肝肚幾毋盼得，阿姆到老還係驚怕佢兜食毋飽、毋罉食。

好得，佢毋會過戇戇相信阿姆食毋落咧，佢拉等阿姆个手坐兼來，膠佢講：「阿姆，偲俵愛共下食正會有好味緒哦！」

108 年全國語文競賽客家語朗讀文章教師組（海陸腔）

編號 07 號

【尋轉火焰蟲】廖惠貞原作

講著火焰蟲，就會想著頭擺，該係童年最靚个回憶。

還細時節阿婆長下會帶等細人仔念：「火焰蟲，唧唧蟲，楊梅樹下吊燈籠，燈籠光，照四方，燈籠暗……」暗晡頭，伙房屋个細人仔洗好身腳，就兜等細凳仔插等草蓆到大坪下，又搞又唱童謠。有時阿婆阿太擘地豆，佢兜拿地豆莢夾耳空，做耳環戴。

細舅會帶等一群細人仔走到菜園、田脣，摺一瞞一瞞¹个火焰蟲搞，阿婆就會大嫵聲駭喊：「外背暗摸胥疏²，遽遽轉來哪！毋好搞火焰蟲啦！佢也係一條命！」一群人走轉大坪下，搞踢銅笏仔，搞園人尋。火焰蟲也會飛到大坪下！較細个細人仔會睡在草蓆町念「月光華華，細妹煮茶……」算天頂滄滄个星仔，足相³个叔婆太又喊：「毋好指月光！會分佢割耳空！」

到臺北讀書，好朋友戴在大溪烏嘴山町。生物先生識帶等佢兜翻兩座山去採集。山肚無牽電，伯姆還點等蠟燭煮飯，佢兜暗晡頭也點等蠟燭討論，火焰蟲飛落廳下來鬥鬧熱。先生講「山頂

無電無光害，火焰蟲正做得生存！」有一擺摺朋友興蹠蹠仔⁴去山頂尋佢，無堵著，嗰分臨暗仔滿山滿谷个火焰蟲著驚著，正經「滿山塘樹邊，飛光千千點」个樣仔，一大遍金金像天頂个星仔跌下來；又像樹頂開等一蕊蕊金金个花。兩儕看到呆忒⁵，行這輪正經值！

識摺小朋友講起「火焰蟲」，已多人無看過，講著《火焰蟲个塚埔》就知咧，這係日本宮崎駿先生个動畫，14 歲个阿哥摺 4 歲个老妹在美國空襲時失忒阿姆，兩姊妹⁶去靠親戚，包尾戴在山窿生活當苦，毋過暗晡頭做得看滿天飛上飛下个火焰蟲。老妹因為營養毋罅死忒咧，盡衰過哦！也識聽朋友講過，去澳洲參觀峽谷底个火焰蟲，坐細船仔時不准人出聲，也做毋得翕相。臥頭看往上，成千上萬个火焰蟲停在嶺頂，像歸片个寶石發光，儕儕都看到嘴擘擘。朋友對佢兜用心愛惜火焰蟲个心當感動！

盡久無看著火焰蟲咧，頭擺庄下暗晡頭一瞞一瞞个身影，幾時做得再過見著？大溪、澳洲、《火焰蟲个塚埔》个火焰蟲帶來歡喜摺辛酸。佢最懷念个還係田寮莊下，竹籬圳溝脣个火焰蟲，哪量時做得尋轉火焰蟲，尋轉無愁無慮个童年。

¹ 一瞞一瞞：音 rhid ngiab rhid ngiab；一閃一閃。

² 暗摸胥疏：音 am`mo`si so；很暗。

³ 足相：音 ziug siong`；指人性情不穩，易怒、孤僻、反應過當。

⁴ 興蹠蹠仔：音 him`dia`dia`er；興沖沖的。

⁵ 呆忒：音 ngoi ted；發愣。

⁶ 兩姊妹：音 liong`zi`moi`；稱姊弟、姊妹或兄妹兩人，此處指兄妹兩人。

【雞肉菇】張捷明原作

「啊！雞肉菇耶！佢來擲。」

「毋使恁鬥緊！等佢大，轉晝¹正來擲。」

山頂有當多好食个東西，毋過有一樣斯山肚人獨享个，戴街路个人毋單淨想食買無，還根本就毋知有恁樣个好東西，這就係雞肉菇。山肚人有畜雞仔，毋過無年無節無劇雞，雞肉菇就係平常做得食著个免費雞肉。

係講松露係法國人「灶下个鑽石」，該雞肉菇就係山肚人个「桌心²」，這係盡珍貴个一品菜，真正个山珍。

雞肉菇有兩種，一種係大蕊个，一搭正生著一頭，像係單丁子樣。另外一種係細細蕊一生就一大翕拉³，像歸家人共下幾下十蕊，安到姊妹菇。兩種各有特色，共樣恁難尋、共樣恁好食。

雞肉菇生在竹園肚、樹園肚、草頭下，看著這種上天賜分佢兜山肚人个美食就像著著獎⁴，該係運氣，跔跔去尋乜尋毋著。毋過，毋係見樹園就有，還愛看時看刻看天時。燒暖个天時合落過水正會生，半朝晨就鑽出泥面、臨晝仔開始開弓，像一支歸身象

牙色个細遮仔，到下晝一兩點就開始過潦⁵，所以最好个採收期係臨晝仔，忒早無額，忒晝又過潦。

所以這種山珍做毋得放久，斯有擲著萋萋拿來炒菜當合味⁶，尤其係煮竹筍湯，又嫩又滑又清甜，愛當日享受，無辦法保留隔餐、隔日。

佢認識一個農務局个雞肉菇專家宋先生，佢講這係現代科技無辦法用人工培養个菇種，因為該愛有幾下種關鍵條件共下存在，第一係地下一公尺愛有白蟻竇，第二該位愛有菇菌，第三有白蟻竇摻菇菌，還愛有一種微生物做媒人，再過愛氣候溫度摻堵好个水氣，這兜條件人工還無辦法解決，所以還係斯山肚人有好獨享。

還有一隻問題，恁軟恁滑个雞肉菇，愛仰般對恁硬个地泥下一公尺鑽出地面呢？原來菇頂尖頭有一砵比鑽石還較硬，幼幼个生長點負責鑽泥。

雞肉菇做麼个會安到雞肉菇，當然係又嫩又滑又清甜，菇頂比雞髀還較好食。還有一樣係雞肉菇个菇柄，菇柄其實無菇遮恁滑，毋過菇柄擘開後係一絲絲个肉絲，食起來正經像麥當勞个雞肉絲。

佢後生在山頂時節，食過當多雞肉菇，所以當懷念這山珍土產，見擺轉山肚就會尋，毋過，毋知係毋係這下酸雨忒多，造成生態毋平衡，連留在山肚个朋友都講當久無食著咧。

¹ 轉晝：音 zhon' zhiu'；中午回家吃中餐。

² 桌心：音 zog sim'；桌上放在中央，最珍貴的一道菜。

³ 一大翕拉：音 rhid tai' po' lo'；一大串，形容數量多。

⁴ 著著獎：音 chog' do' ziong'；中了獎。

⁵ 過潦：音 go' lau；過熟。菌傘下方開始褐色敗壞。

⁶ 合味：音 gag' mui'；合味道。

【桂花香】邱坤玉原作

人企得正，得人惜；花開得香，較得人愛！毋過，「樹愛軟枝，人愛硬程」正有德行！

阿爸盡好桂花。在美濃老屋个門口種有一頭桂花樹。該桂花斯一枝梗，透路上到像佢恁高，歸枝樹梗企到壁澄¹，梗頭怕有佢个腳囊肚恁大枝。

聽講肢骨²企到澄澄个桂花樹，價數較好。所以，阿爸摻該頭桂花照顧到緊來緊高溜，身材緊來緊靚，葉仔緊來緊榮，到佢讀國中个時節，想拈花穗時還愛躡腳尾呢！

坐在花樹下，引起佢个注意，該樹葉節町暴出手指尾尖个花蕊，桂花散出久久遠遠淡淡个蜂糖味。桂花會恁得人惜，實在係因為桂花个蜂糖香味，雖然淡淡仔，毋過香味盡遠盡耐香；也係因為桂花卵黃色，雖然淡淡仔，毋過像黃皮膚樣，盡靚盡耐看！

這頭桂花樹受著特別个款待，阿爸愛佢摻樹頭个四圍清淨來，係無歿忒个樹葉仔會害樹頭生菌，燥忒个樹極愛鋸忒正靚，樹下有綻出來个樹秧愛徙走，無身分个雜草就愛擲淨來，一息就

濫糝毋得。等到清淨咧，愛用細細箒个紅紙，摻該桂花樹圈到紅紅，還愛貼五福紙，在年三十開始逐朝晨暗晡愛燒香，年尾拜到年初。

佢知佢个花期短短仔定定，中意桂花个「色」、「香」係一種精神上个安慰，係時間在該流轉，漸漸仔褪色後，正發現个靚！係佢淡淡个香味毋摻玉蘭花、七里香爭排名；細細圓圓个花型黃黃白白，毋摻牡丹花、燈籠花爭大細；簡單到也無像蘭花身頂有錦霞樣个線條。阿爸認為，該桂花係最得人尊敬个君子。

像宋朝李清照在詩裡背有形容淡黃色个桂花，暗淡輕黃、體性溫潤，色淡香濃，在讀書人心目中係百花中个第一流。君子立身處事在安於幽靜，毋惹人注意，斯留香味在天地。無需要像大花紅碧艷麗，招來蜂蝶惹身傷性。

佢也信神，逐朝晨暗晡愛燒香。打早翫床，係拈一盤桂花來拜灶君爺；臨暗時節，係摻該盤桂花拿來泡茶，泡出个桂花味鼻起來盡溫和，花茶色清淡，食著順喉。恁樣跔等阿爸虔誠用桂花拜神、拜灶君爺，一直拜到阿爸百年歸仙過後。

這頭桂花樹噯因為道路拓寬，分粗暴个怪手摻無知識个工人，少一份耐心，毋肯先來斷根，少一份軟心，毋肯真心相惜，無想該花榮青蔭、薄皮幼肉个桂花，仰有能力抗議訴說佢个傷痛？硬硬分該怪手摻佢強制挖開，所以無法度生存噯來燥忒，正式當打爽！莫怪花樹會悲痛，傷心到死。

¹ 壁澄：音 biag den；形容如牆壁般直立著。

² 肢骨：音 gi` gud；身材骨架。

【答識】賴維凱原作

本成愛回收个大紙絡仔，嘎看著裡背還搭有一細垵月光餅。算來這歲數比佢還較後生个同事，當知得麼个安到「答識¹」，心肝頭湧出一陣燒暖。還細該下，阿姆見擺擺等燒爌爌个鉢仔分阿公、阿婆，下二擺再過去收个時節，鉢仔裡背總係重鈦鈦仔，毋係進口个糖仔就係餅仔，毋係江瑤珠²就係福神漬，逐擺都無麼个共樣。佢見看著鉢仔一轉來，就會想打開來看，毋過，見手一伸出去，定著就會有箸頭嫵敲啊過來，所以都會乖乖等阿姆抹這抹該過後，正踅等阿姆打開來看裡背有麼个？鉢仔逐擺毋係分阿公搓到極淨，就係分阿婆粹到燥燥，裡背就係為著愛放兜仔等路。

「答識」，毋單淨係「答識」！從細到大，係「浸」在這裡背个生活，總係體會得出來。毋過，這裡背个人情世故、微毛末節，無準則、也寫毋出來，乜係佢兜這世代个後生仔，仰般都無法度「答」出來个……。

朝晨頭，阿姆去看過「文光哥」後，目紅鼻紅，摻佢講佢毋

識看過个阿伯仰般衰過，因為著著糖尿病，這下又瞎目咧。佢好奇這阿伯到底係麼人？下後正知「文光哥」係大舅姆在臺灣該下，一等照顧佢个好朋友。佢心肝肚想：這摻阿姆有麼个關係？乜無聽過大舅姆有特別交代，喊阿姆去摻佢看這個朋友，算起來係無麼个熟事个人。暗晡頭，阿姆一頭拗等重鈦鈦个營養品摻頂高寫等葡萄牙文个箱仔，一頭監佢摻佢抄一下巴西个住址，佢愛寫信仔分大舅姆。

阿爸對外背正轉啊來，就分阿姆吩咐去買寄航空个信絡仔，佢一聽啊著就在門口嘍嘍嘍嘍：「又毋早兜講，這下起風咧，又落恁粗个水點，愛喊佢仰般買？」阿爸平常時就當會摻阿姆「應嘴擘鼻」。「毋會著水衣咩？麼人會知你頭下去哪啊？喊你買就去買！還恁多麼个好講？」照阿爸平常時个個性，佢揣佢聽著恁樣个話，絕對食佢毋燥，無恁著佢無再過應，水衣一著，奧多拜³騎啊著就去買咧！

大舅姆自阿姆著著癌症過後，長透寄營養品分佢，就算大舅過身恁多年咧，乜共樣定期寄來，無一擺摻阿姆算過錢。啊！「文光哥——大舅姆——阿姆——文光哥」，佢做一下恁通咧！毋使揣乜知信仔裡背會寫麼个咧！毋使問乜知阿姆做麼个會去看文光哥咧！信絡仔裡肚，佢定定仔寫，寫毋著，扯忒，過寫！寫毋靚，扯忒，過寫！

¹ 答識：音 dab shid；本指舊識有紅白喜事，彼此包禮回謝，在此特指彼此禮尚往來的酬答。

² 江瑤珠：音 gong` rhau zhu`；干貝。

³ 奧多拜：音 o do bai`；源自日語オトバイ，機車。

【畜蜂仔个人】李秉璋原作

「來哦！來買蜂糖！來買蜂糖哦！蜂糖無純，剝頭！」這係一隻當舊當久个笑話。剝頭，毋係剝生理人个頭，係剝蜂仔个頭。這雖然分人感覺好笑，毋過乜係講想愛買著百分之百純蜂糖無恁該，市面上有當多假个蜂糖，有用果糖去敵¹，有用糖來供蜂仔，當多齣事。這就講蜂糖係當寶貴乜係當貴个東西。尤其係這幾年來蜂仔當大陣个死忒，蜂糖个價數就越來越高，毋過畜蜂仔个人乜當擔心，蜂仔若係死恁多，佢兜就會無蜂糖好收。

畜蜂仔个人盡像「游牧民族」，一年透冬愛滿哪位走。花在哪位，佢兜就在哪位。冬尾个油菜花田，三、四月个荔枝花開，接下來換牛眼花開，佢兜都愛躡花來徙位，哪位有花，佢兜就躡去哪位，愛上山也愛落平洋。把鴨仔个人把幾下千隻鴨仔，毋過畜蜂仔个人手頭係幾下十萬隻，幾下百萬隻个蜂仔。手扼百萬軍以外，還愛有分蜂仔叨个心理準備。

畜蜂仔个人係一代接過一代，在阿姆个肚屎肚就躡等阿姆畜蜂仔。荔枝花膠牛眼花開該時，就係最無閒个時節，愛日合夜做

事，膠蜂糖收起來，一箱過一箱掀開，膠蜂竇拿出來打蜂糖²，三百箱个蜂箱做得收五、六鐵桶个蜂糖，一桶差毋多有五百斤，毋過一年盡望就望這時。歸屋下个人做下都調來搵做。世大人這時就會講：「做事手腳愛遽，若係懈懈怠怠就做無好食。」收好个蜂糖膠傢啦伙乜愛收起來放。所以愛特別起一間倉庫來放，分蜂糖有一隻好所在。

冷天時，蜂仔無東西好食，這量時就愛用花粉抑係糖來供蜂仔。畜蜂仔該時，頭那戴落等網仔个笠嫲，著長衫、長褲、長笏鞋。到畜蜂仔个位所，先膠樵放落煙罐³，起火了後，手戴手袋仔拿等煙罐掀開蜂箱蓋，手掀煙罐，用煙罐个煙攞蜂仔。再過膠裡背一片一片个蜂竇拿出來檢查，看有蜂王無，若係忒多就愛膠最強壯个留下來，最驚就係連蜂王都死忒，這箱个蜂仔就毋食東西，做下無效去。蜂箱裡背个蓋仔係有結蜂蠟，就愛膠佢鏟起來，膠蜂箱整理整理，分蜂仔有一隻舒適个竇。鏟起來个蜂蠟，做得拿來食，食起來像樹乳糖。有時節蜂箱裡肚个蜂仔忒少，還會有蟻仔來食糖膠蜂蟲，有時還有人會來偷拿蜂箱，這兜全係畜蜂人最掛心个。照顧蜂仔就像顧自家个細人仔，驚佢冷、驚佢無食个、驚佢病、驚佢分蟻仔欺負、驚佢分人偷。直直掛心到明年春天，該香香甜甜个蜂糖就係分畜蜂仔个人最好个禮物。

¹ 敵：音 teu'；摻雜、沖泡稀釋。

² 打蜂糖：音 da' pung` tong；將蜂巢片放入採蜜機中採集蜂蜜。

³ 煙罐：音 rhan` gon~；噴煙器，用來驅趕蜜蜂，避免蜜蜂叮咬以方便工作。

108 年全國語文競賽客家語朗讀文章教師組（海陸腔）

編號 12 號

【倒垃圾】林伯殷原作

逐日臨暗仔六點零，除忒清潔隊放寮日以外，佢个隔壁鄰舍就會攞等大包細包个垃圾行出來，企在大路脣等垃圾車，等到車隊駛兼咧，大家就熟手个摻垃圾倒落行頭前个垃圾車，再過轉身摻壞銅壞鐵交分座後个資源回收車，雖然，大家對倒垃圾早就非常熟絡，毋過，三不二時還係會看著有人抓等垃圾在大路追垃圾車，該時，實在毋知係愛笑、抑係愛噉，總講，大家一日過一日倒垃圾、清潔隊一日過一日收垃圾，臨暗仔時節愛倒垃圾早就變成大家生活个一部分咧！

倒垃圾摻用水、電、瓦斯當相像，係重要个公共事務，順順个時節，人毋多知，係停忒幾日，該事情就大條咧！像頭擺有兜所在个垃圾無地方好倒，清運發生問題，滿哪位垃圾囤囤摻¹，黏時就變成當地个重大事件，就算地方首長舂上跌落²暫時來解決，過幾年又也可能再過發生，垃圾問題強強變成地方發展个陰影。還有，人个天性就係人人會生產垃圾，同時，儕儕又無愛垃圾，該垃圾愛倒去哪位？早先，各地大體係尋較偏僻个位所來埋垃

圾，過後，埋个地方緊來緊難尋，加勝垃圾緊來緊多，各地就起焚化爐來燒垃圾，垃圾燒過後，量少忒已多，毋過，空氣污染、爐灰清運等其它問題又跔等來，講實在，處理垃圾無恁該食，就算現下个技術比頭擺進步當多，還係難做到十全十美，其實，還係愛大家發揮公德心，共下來少倒兜垃圾正係最好个解決辦法。

愛仰般正做得少倒兜垃圾呢？基本上，愛做到省用摻資源回收兩項。省用就係少用兜、毋好打爽，摻客家人「省儉」个精神共樣，該用个正用，該省个就省，比論講，出門自家帶茶、帶碗箸，買東西自家帶袋仔，省用兜，垃圾自然就會跔等少咧！續等就係愛做好垃圾分類、資源回收，做回收就係「惜物」，毋好折福个意思，將紙、鐵、塑膠、玻璃等等做得再過利用个東西收起來，送轉工廠重新變做原料，垃圾經過回收後，定著會減忒盡多。

處理垃圾毋單淨係政府个責任定定，乜愛儕儕共下用心來配合。好得，臺灣有盡多民間團體當煞猛在該搵手宣傳垃圾減量摻做資源回收，恁多年下來，關心垃圾問題个人也緊來緊多，總愛大家有心來少倒兜垃圾，相信佢个環境就有機會越變越好。

¹ 囤囤摻：音 dun' dun' ciu'；囤積很多。

² 舂上跌落：音 zhung` shong` died log`；忙上忙下。